

# **Wakita ge Zeṅ ya àbəki enjenjeni ni**

## **Ere ye ti mǎdǎmki ka wakita ge Zeṅ ya àbəki enjenjeni ni**

Maslaṅa ya ti àbəki wakita hini ni ti àdǎfay slimi gayan a wakita ni bu ndo. Ay kwa ka mǎnjəki gani ndam ga Yezu dek tǎsəra nani Zeṅ zal asak ga Yezu, nan bay ya àbəki Ma Mǎweni Sulumani ge Zeṅ ni. Ma gayan ya àbəki ni ti akada ga ma ya mǎdi ahàr a Ma Mǎweni Sulumani ge Zeṅ ni bu ni ; maslaṅa ya ti àbəki wakita cǎeni ni ti mis bilin (gurumkabu Zeṅ 1. 1, 1.14 akaba 1 Zeṅ 1.1 ; Zeṅ 16.24 akaba 1 Zeṅ 1.4 ; pakama ndahaṅ tǎbu kay akada nday nani).

Àbiki ti ana ndam ga Yezu (3.1) ; àzalaya slimi ge mis ahkay do ni ga kǎsa ndo, nahkay mǎdǎm tǎslǎrikaboru wakita hini ana ndam ga Yezu ya a kǎsa gǎrgǎrani bu ni. Zeṅ àdǎm abəki wakita ni ti awayay ti mis ndahaṅ tǎgosay ndam ga Yezu ba (2.26 ; 3.7 ; 4.1), akaba awayay ti tǎsər, nday tǎbu àna sifa ya àndav dǎy-dǎy do ni ededīṅ ededīṅeni (5.13).

A wakita ni bu Zeṅ àdǎm maslaṅa ya ti àdǎm àsəra Yezu a, mək agudar zlam kǎlavađ ni ti zal mǎfada : bay ya ti àsəra Yezu a ni ti ambrəṅ zlam magudarani gayan ni, àgudar zlam va do. Tamal mǎgudara zlam a mək mǎmbatkaba majalay ahàr a ti Yezu ambərfəṅa zlam geli ya mǎgudar na kè leli a,

ay ahàr àdám ndam ga Yezu tâmbrəṅ zlam magudarani dek, adaba nday bəza ge Melefit ; Melefit ti njəlata. Melefit awayay leli : ahàr àdám leli day mâwayum Melefit akaba ndam gayan ni. Tamal mawayay Melefit ti mągudar zlam va do ; nahkay məsəra, leli ndam gayan efedin efedineni.

### *Pakama ya avi sifa ana mis ni*

<sup>1</sup> Ere ye ti məbiki ana kəli ka wakita ni ti Pakama ya avi sifa ana mis ni. Kwa ka mənəkəi ga məlanəṅ naṅ àbu. Pakama gani nani ti ègia mis a. Leli micia pakama gayanəṅ ya àdám na, mīpia naṅ àna eri geli a, māmənjaləṅa lala, mīnjifinəṅ àna ahar geli a daya.

<sup>2</sup> Sifa gani nani àṅgazlava. Ka ya ti àṅgazlavu ni ti leli mīpia, magray sedi gani, məhi pakama gani ana kəli vay-vay daya. Sifa gani nani ti àndav day-day do, kwa ahaslani naṅ àbu afa Bəṅ geli Melefit, nihi ti àṅgazliva àna leli a.

<sup>3</sup> Ere ye ti leli mīpi akaba mīci ni ti məhi ana kəli bilegeni, ti lekələm day kədəgumkiva ke leli a, mīgum leli dek akada mis bəlanəṅ. Leli ti məbu akada mis bəlanəṅ akaba Bəṅ geli Melefit nday ata Wur gayanəṅ Yezu \*Krist.

<sup>4</sup> Məbiki pakama hini ana kəli ti, mawayay ti kīcəm lala, nahkay leli dek aməmərvu ka ahar bəlanəṅ lala.

### *Maslanəṅ ya agudar zlam ni ànjəhad akaba Melefit koksah*

<sup>5</sup> Pakama ya ti mīcifinəṅ, məhi ana kəli ni ti nihi : Melefit nahəma, masladani njəlata, naṅ àbi àna məlanəṅ ziṅ-ziṅeni bi ferera.

<sup>6</sup> Tamal mǎdǎm leli akaba naṅ akada mis bəlan, mək mǎbu magray zlam e ziṅ-ziriṅni bu nahəma masəkad malfada, ere ya magray ni ti zlam ge jiri do.

<sup>7</sup> Ay tamal magray zlam a masladani bu akada gayan ya naṅ abu a masladani bu ni ti leli mǎbu dek ka ahar bəlan akada mis bəlan. Nahkay mimiz ga Wur gayan Yezu abarafəṅa zlam magudarani geli na kè leli a.

<sup>8</sup> Tamal mǎdǎm mǎgudar zlam do ni ti magosay ahàr geli geleni, leli ndam jireni do.

<sup>9</sup> Ay tamal madafaya zlam magudarani geli na ti Melefit ambərfəṅa kè leli a, abarafəṅa zlam ya abəlay do na dek kè leli a. Agray nahkay ti adaba naṅ jireni ; ere ye ti adəm amagray ni ti agray ededīṅ.

<sup>10</sup> Tamal mǎdǎm leli mǎgudar zlam ndo ni ti kala mǎdǎm Melefit asəkad malfada. Tamal mǎdəma nahkay ti mǎgəskabu pakama gayan a mǎbəruv geli vu ndo.

## 2

<sup>1</sup> Gabəza, nəbiki zlam hini ana kəli ti, nawayay ti kǎgudarum zlam ba. Ay kwa tamal maslaṅa àgudara zlam a nəṅgu ni, bay ya ti embikivu ke leli, agri kam-kam ana Bəṅ geli Melefit ni naṅ abu kè meleher gayan. Bay mimbikivani ke leli ti Yezu \*Krist, naṅ ti mis jireni, àgudar zlam do.

<sup>2</sup> Avay vu gayan, takad naṅ ti Melefit mǎmbərfəṅa magudar zlam geli ni kè leli a. Esliki mǎmbərfəṅa zlam magudarani geli na ciliṅ do, esliki mǎmbərfəṅa zlam magudarani ge mis ga duniya na dek daya.

*Tamal mèsəra Melefit a ti magray ere ye ti awayay ni*

<sup>3</sup> Tamal leli m̀bu magray zlam ya ti Melefit àhi ana mis e \*Divi gayan̄ bu grum ni ti m̀səra leli ti m̀səra Melefit a.

<sup>4</sup> Ay tamal maslaṅa àdəm àsəra naṅ a, mək àgray zlam ya ti Melefit àdəm e Divi gayan̄ bu grum ni do ni ti maslaṅa nani asəkad malfada. Naṅ nani ti mis jireni do simiteni.

<sup>5</sup> Maslaṅa ya ti agray zlam ya Melefit àdəm grum ni ti awayay Melefit àna m̀bərur bəlan̄ eded̄iṅ eded̄iṅeni. Tamal magray nahkay ti m̀səra leli ndam ge Melefit, leli bilin̄eni akaba naṅ.

<sup>6</sup> Tamal maslaṅa àdəm anjəhadkabu akaba naṅ nahəma, ahàr àdəm maslaṅa nani agray zlam akada ga Yezu ya àgray ni kwa.

<sup>7</sup> Zləbəba goro ni, zlam hini ya nəbiki ana kəli ni ti zlam m̀wəni do. Nani Divi ge Melefit ya ahaslani ni sawan̄. Kwa ka ya ti kəfumki ahàr ka Yezu ni ti kəsəruma Divi gani nana. Divi gani ya ahaslani nani ti pakama ya t̄hi ana kəli ni.

<sup>8</sup> Ay ti pakama ya nəbiki ana kəli ni ti divi m̀wəni daya. Mis t̄sər divi gani nani eded̄iṅ ti àna manjəhad ga Yezu, t̄sər àna manjəhad gekəli daya. Nahkay məlan̄ ziṅ-ziṅeni naṅ àbu andav, maslad̄ani sulumani ànjəkia ka maslad̄ana.

<sup>9</sup> Tamal maslaṅa àdəm naṅ a maslad̄ani bu mək ezirey wur ga mən̄ani ti maslaṅa nani naṅ e ziṅ-ziṅeni bu mba sawan̄.

<sup>10</sup> Ay tamal maslaṅa awayay wur ga mən̄ani ti maslaṅa nani naṅ àbu a maslad̄ani bu, arañə àbi a m̀bərur gayan̄ bu ge mijin̄kia naṅ ke divi a bi.

<sup>11</sup> Ay tamal maslaña ezirey wur ga mənani ti maslaña nani nañ e ziñ-ziñeni bu. Nañ àbu asawaday e ziñ-ziñeni bu daya, àsər məlan̄ ya akoru ni do ; èpi divi do adaba nañ e ziñ-ziñeni bu.

*Kə̀dabum zlam ga duniya ba*

<sup>12</sup> Gabəza, ere ye ti nəbiki ana kəli ni ti nihi : Melefit àmbərfəña magudar zlam gekəli na kè kəli azuhva Yezu a.

<sup>13</sup> Ata bəñ ga bəza, ere ye ti nəbiki ana kəli ni ti nihi : Lekələm ti kəsəruma bay ya ti nañ àbu kwa ka mən̄jəki ga məlan̄ na.

Bəza dagwa, ere ye ti nəbiki ana kəli ni ti nihi : Lekələm ti kiyəmfiña kè \*Seteni àna kadvu a.

<sup>14</sup> Gabəza, ere ye ti nəbiki ana kəli ni ti nihi : Lekələm ti kəsəruma Bəñ geli Melefit a.

Ata bəñ ga bəza, ere ye ti nəbiki ana kəli ni ti nihi : Lekələm ti kəsəruma bay ya ti nañ àbu kwa ka mən̄jəki ga məlan̄ na.

Bəza dagwa, ere ye ti nəbiki ana kəli ni ti nihi : Lekələm ti kəbum àna njəda, pakama ge Melefit àbu a məbəruruv gekəli bu, kiyəmfiña kè Seteni àna kadvu a.

<sup>15</sup> Kə̀dabum divi ya ndam ga \*duniya tadəbay ni ba, kawayum zlam ya tədi ahàr a duniya bu ni ba daya. Tamal maslaña awayay zlam ga duniya nahəma, maslaña nani ti àwayay Bəñ geli Melefit koksah.

<sup>16</sup> Zlam ga duniya nday nani ya mis tagray ni ti nday hi : tawayay zlam ya məbəruruv gatay awayay ni dek, tawayay zlam ya egi eri ni dek, təngəta zlam a ti tagray zlabay àna nañ. Zlam nday nani dek ti Bəñ geli Melefit àdafaki ndo, mis təcəhay a duniya bu zlam gatay.

17 Duniya akaba zlam ya a duniya bu, mis tawayay tɔŋgət ni dek naŋ àbu andav. Ay ti maslaŋa ya ti agray ere ye ti Melefit awayay ni ti maslaŋa nani amanjəhad ga kaŋgay-kaŋgayani.

*Ndam ezir ge Krist*

18 Gabəza, duniya andav wudak. Kìcuma, təhia ana kuli a zal ezir ge \*Krist amara. Ay nihi ti ndam ezir ge Krist təbu kay àndava. Nahkay ti məsəra duniya andav wudak eɗeɗiŋ.

19 Ahaslani ndam ezir ge Krist nday nani ti təkibu ke leli, mək təsləkakiba ke leli a. Tamal ti nday ndam geli eɗeɗiŋ ti akal tənɣəhad a akaba leli a. Ay ti zlam gani àgravu nahkay ti, ti leli məsərkaba nday ndam geli eɗeɗiŋ do.

20 Lekulum zla nahəma kəbum àna \*Məsuf Njəlatani, Yezu Krist àvi ana kuli. Nahkay ti lekulum dek kəsəruma jiri a.

21 Nəbiki ana kuli ti kamam ? Ga məhiani ana kuli kəsərums jiri do tək ? Aha, ga məhiani ana kuli kəsəruma sawaŋ. Kəsəruma malfaɗa àbi àhəraya e jiri ba bi daya.

22 Maslaŋa ya ti asəkaf malfaɗa kay ni ti way ? Maslaŋa nani ti maslaŋa ya ti àɗəm Yezu ti naŋ Krist \*Bay gəɗakani ya amara ni do ni. Maslaŋa nani ti zal ezir ge Krist : àgəskabu Bəŋ geli Melefit nday ata Wur gayay ni ndo.

23 Maslaŋa ya ti àgəskabu Wur ge Melefit do ni ti àgəskabu Bəŋani Melefit ndo daya. Maslaŋa ya ti àgəskabu Wur ge Melefit ni ti àgəskabá Bəŋani Melefit a daya.

24 Lekulum zla ti ere ye kicum kwa ka sarta ya kəfumki ahər ka Yezu Krist ni ti ahər àɗəm ere gani nani mənɣəhad a məbəruf gekuli bu. Tamal

ere ye ti kicūm kwa ka sarta ya kəfumki ahàr ka Yezu ni anjəhad a məbərɔv gekɔli bu ni ti lekɔlɔm day akanjəhadum akaba Wur ge Melefit nday ata Bəŋani akada mis bəlaŋ.

<sup>25</sup> Ere gani nani dek ti \*sifa ya àndav day-day do ni. Sifa gani nani ti Yezu àdəm aməvi ana leli.

<sup>26</sup> Zlam gani nday nani dek nəbiki ana kɔli ti adaba mis tawayay magosay kɔli palam.

<sup>27</sup> Lekɔlɔm zla nahəma kəbum àna Məsuf Njəlatani, Yezu Krist àvi ana kɔli. Məsuf gani nani ti àbu manjəhadani a məbərɔv gekɔli bu. Nahkay ti wudəra gekɔli àbi akaba bay macahi zlam nahaŋ ana kɔli va bi : Məsuf Njəlatani naŋ àbu acahi zlam dek ana kɔli. Naŋ ti àsəkad malfada do, zlam gani ya acahi ana kɔli ni ti ma ge jiri. Ahàr àdəm kənjəhadum akaba Yezu Krist akada mis bəlaŋ ; Məsuf Njəlatani àcahi ana kɔli ni ti nahkay.

<sup>28</sup> Gabəza, nihi ti ahàr àdəm kənjəhadum akaba Yezu akada mis bəlaŋ. Adaba mam, nawayay ti ka ya ti amanŋa ni ti aŋgwaz àwər leli ba. Ka ya ti aməzlərəvaya ni ti nawayay ti mimili àwərfəŋa leli ga mahədakfəŋiani ba.

<sup>29</sup> Kəsəruma Yezu Krist ti naŋ jireni. Nahkay ahàr àdəm kəsərɔm maslaŋa ya ti naŋ àbu agray zlam jireni ni ti maslaŋa gani nani Melefit ègia bəŋana daya.

### 3

#### *Leli bəza ge Melefit*

<sup>1</sup> Nŋa pəm day, Melefit àwaya leli a dal-dal ni ! Nahkay àzala leli bəza gayan a. Iy, leli bəza gayan

efedīṅ ! Nḡay leli bəza ge Melefit ti ndam ga \*duniya təsər do, adaba nday nani təsər Melefit ndo palam.

<sup>2</sup> Zləbəba goro ni, nihi ti leli bəza ge Melefit àndava. Ay ti emigi mam kama ni mam ti Melefit àdəfiaba ana leli a faṅ ndo. Ere ye ti məsəra nahəma, ka ya ti aməzlərəvaya ni ti emigi akada gayan ni, adaba emipi naṅ lala.

<sup>3</sup> Maslaṅa ya ti ajəgay Yezu \*Krist, awayay egi akada naṅ ni ti, maslaṅa nani abi slimi ana ahər gayan, àgudar zlam do, akada ga Yezu ya àgudar zlam do ni.

<sup>4</sup> Maslaṅa ya ti naṅ àbu agudar zlam nahəma, àgəskabu \*Divi ge Melefit ya a Wakita gayan ni bu ni ndo. Ndam magudar zlam ti ndamam ? Nday ndam ya tàwayay divi ge Melefit do ni.

<sup>5</sup> Ay ti kəsəruma Yezu Krist àra a məlan va ga məhəlfəṅa zlam magudarani geli kè leli a. Kəsəruma naṅ ti àgudar zlam do simiteni.

<sup>6</sup> Maslaṅa ya ti naṅ àbu anjəhad akaba naṅ akada mis bəlan ni ti àgudar zlam va do. Ay ti maslaṅa ya ti naṅ àbu agudar zlam nahəma, èpi Yezu day-day ndo, àsər naṅ do daya.

<sup>7</sup> Gabəza, mis tàgosay kəli ba. Maslaṅa ya ti naṅ àbu agray zlam ge jiri ni ti naṅ mis jireni akada Yezu Krist naṅ jireni ni.

<sup>8</sup> Maslaṅa ya ti naṅ àbu agudar zlam nahəma, naṅ wur ge \*Seteni. Adaba mam, kwa ahaslani Seteni naṅ àbu agudar zlam zlam gayan, àmbrəṅ ndo. Nahkay Wur ge Melefit àra a duniya va : àra ti ga maslamalay zlam ya Seteni agudar ni dek.

<sup>9</sup> Maslaṅa ya ti Melefit ègia bəṅana ni ti àgudar zlam va do. Adaba mam, Melefit àvia Məsuf



Njəlatana, àniviyu a məbəruv bu, nañ àbu anjəhad akaba nañ. Nahkay maslaña gani nani èsliki magudar zlam va do, adaba Melefit ègia bəñana.

<sup>10</sup> Məsərkaba way wur ge Melefit ni way ahkay do ni way wur ge Seteni ni way ti nahkay hi : maslaña ya ti àgray zlam ge jiri do ni ti nañ wur ge Melefit do. Maslaña ya ti àwayay wur ga mənani do ni ti nañ day wur ge Melefit do.

### *Ahàr àdəm mawayumvu*

<sup>11</sup> Nahkay ti mawayumvu e kidin geli bu. Hini ti pakama ya kicəm kwa ka sarta ya kəfumki ahàr ka Yezu ni.

<sup>12</sup> Məgrum akada ga \*Kayin ya àgray ni ba. Nañ ti wur ge \*Seteni, nahkay àkad wur ga mənani ndaf ga njəda. Àkad wur ga mənani gani ti kamam jiken mam ? Àkad wur ga mənani ni ti adaba zlam ga wur ga mənani ya àgray ni dek ge jiri, zlam gayan gayanani ya àgray ni dek magədavani palam.

<sup>13</sup> Bəza ga mmawa, tamal ndam ga \*duniya tizirey kəli ti àgri ejep ana kəli ba.

<sup>14</sup> Leli ti məsəruma Melefit àhəngaraba leli e kisim ba, àvia sifa ana leli a àndava. Məsəruma ti adaba mawayum bəza ga mən geli. Maslaña ya ti àwayay mis do nahəma, Melefit àhəngaraba nañ a ndo, nañ məmətani.

<sup>15</sup> Maslaña ya ezirey wur ga mənani ni ti nañ bay makad mis. Ay kəsəruma bay ya ti akad mis nahəma, \*sifa ya àndav day-day do ni ti àniviyu a məbəruv bu bi.

<sup>16</sup> Yezu \*Krist ti àwaya leli a, àgəskabu ti təkad nañ azuhva leli. Àdəfiki mawayavani ana leli ti nahkay. Leli day ahàr àdəm məjənaki bəza ga

məṅ geli, ku tamal tabazl leli azuhva tay nəṅgu ni mægəskabu.

<sup>17</sup> Tamal ti maslaṅa zlam gayan əbu, èpi ti zlam əfəṅ kà wur ga məṅani bi mək əmənjaləṅ do nahəma, əbəlāy do. Maslaṅa nani ti awayay mis akada ge Melefit ya awayay mis ni tata aw ? Aha, àwayay do.

<sup>18</sup> Gabəza, məwayum mis àna pakama cilin ba, ahàr ədəm mawayum mis ededīṅ, mægri zlam sulumani ana tay.

*Bəza ge Melefit ti aṅgwaz àwərfəṅa tay kè Melefit a do*

<sup>19</sup> Tamal magray nahkay ti aməsər leli ti ndam jireni, aṅgwaz aməwərfəṅa leli kè Melefit a do daya.

<sup>20</sup> Ku tamal məhi ana ahàr mægudara zlam a nəṅgu ni, aṅgwaz aməwərfəṅa leli a do, adaba Melefit àsəra ere ye ti a məbərūv geli bu na àtama leli lelēna ; naṅ ti àsəra zlam a dek.

<sup>21</sup> Zləbəba goro ni, tamal məsəra mægudar zlam ndo nahəma, aṅgwaz aməwər leli kè meleher ge Melefit do.

<sup>22</sup> Nahkay zla nahəma, aməvi ere ye ti mihindifinā ni dek ana leli, adaba leli məbu magray ere ye ti àhi ana leli grum ni akaba ere ye ti àbəlāfəṅ ni.

<sup>23</sup> Ere ye ti àhi ana leli grum ni ti nihi : si məfəki ahàr ka Wur gayan Yezu \*Krist akaba mawayumvu e kidin geli bu kwa. Àhi ana leli grum ti nahkay.

<sup>24</sup> Nahkay maslaṅa ya ti agray ere ye ti Melefit àhi ana leli grum ni ti maslaṅa nani ti naṅ əbu akaba Melefit akada mis bəlan. Məsər ti Melefit

naŋ àbu akaba leli ti ahəmamam ? Məsər ti adaba àvia \*Məsuf gayan ana leli a.

## 4

### *Məsər Məsuf ge Melefit ti ahəmamam ?*

<sup>1</sup> Zləbəba goro ni, ndam ya tədəm təzlapay àna njəda ga \*Məsuf ni dek ti kəgəsumkabu pakama gatay ni ba. Hojo sayumfəna kà tay a day, akal ti nday təbu àna Məsuf ge Melefit aw. Adaba mam, mis dal-dal təbu a duniya bu, tədəm nday ndam mahəngaray \*pakama ge Melefit, ambatakani do nday ndam masəkad malfada sawan.

<sup>2</sup> Akəsərum ti maslaŋa hini azlapay àna njəda ga Məsuf ge Melefit ti nahkay hi : ndam ya ti tədəm vay-vay Yezu \*Krist àra a duniya va, ègia mis hihirikena ti, nday dek təzlapay àna njəda ga Məsuf ge Melefit.

<sup>3</sup> Ay ti maslaŋa ya ti àdəm Yezu àra a duniya va ndo ni ti, maslaŋa nani àdəm ma ge Melefit do, azlapay àna njəda ga məsuf ga zal ezir ge Krist sawan. Lekələm kicəma məsuf gani nani amara a duniya va : nihi ti ènjia àndava.

<sup>4</sup> Gabəza, lekələm ti bəza ge Melefit. Nahkay kiyumfiŋa kà ndam nday nana ya tasəkad malfada na. Adaba mam, Məsuf ya àniviyu ana kəli ni àtama məsuf ya àniviyu ana ndam ga \*duniya na.

<sup>5</sup> Ndam nday nani ya tasəkad malfada ni ti nday ndam ga duniya. Təzlapaki ti ka zlam ga duniya, nahkay ndam ga duniya təgəsiki ma gatay ni ana tay.

<sup>6</sup> Leli zla nahəma, leli bəza ge Melefit. Nahkay maslaŋa ya ti àsəra Melefit a ti agəsiki ma geli ni

ana leli. Ay maslaṅa ya ti naṅ wur ge Melefit do ni ti àgəsiki ma geli ni ana leli do. Məsərkaba məsuf ya adəm jiri na nday ata məsuf ya asəkad malfada na ti nahkay.

*Melefit adəfiki ana leli ahəmamam mawayumvu ni*

<sup>7</sup> Zləbəba goro ni, ahər adəm mawayumvu e kiđiṅ geli bu kwa, adaba bay ya ti agray ti mis tâwayavu ni ti Melefit. Nahkay maslaṅa ya ti naṅ àbu awayay mis nahəma, Melefit ègia bəjana. Maslaṅa nani ti àsəra Melefit a.

<sup>8</sup> Ay maslaṅa ya ti àwayay mis do nahəma, naṅ ti àsər Melefit do, adaba Melefit ti ere ye ti agray ni dek, agray ti adaba awayay mis.

<sup>9</sup> Melefit adəfiki ana leli, naṅ awayay leli ti ahəmamam ? Adəfiki ana leli ti nahkay hi : àslərbiyu Wur gayanṅ biliṅ biliṅeni ni a duniya vu ga məvi sifa gayanṅ ana leli.

<sup>10</sup> Mawayavani ti mənṅ ga mam ? Leli mawayay Melefit enji aw ? Aha ! Melefit àwayay leli enji sawanṅ. Nahkay àslərbiyu Wur gayanṅ ti tâkad naṅ. Tàkada naṅ a ti Melefit esliki məmbərfəṅa zlam magudarani geli ni kè leli a.

<sup>11</sup> Zləbəba goro ni, Melefit àwayay leli ti nahkay. Tamal àwayay leli nahkay ti àgəsiki ti leli day mawayumvu e kiđiṅ geli bu bilegeni kwa.

<sup>12</sup> Melefit ti maslaṅa ya ti èpia naṅ a bir ni ti àbi. Ay tamal mawayumvu e kiđiṅ geli bu ni ti məsəra Melefit naṅ àbu akaba leli, miḡia akada mis bəlanṅ akaba naṅ a. Məsəra leli məbu mawayay mis àna hud bəlanṅ akada gayanṅ ya awayay mis ni.

13 Leli m̀əbu akaba naṅ, naṅ day naṅ àbu akaba leli akada mis bəlan ti məsər ti ahəmamam ? Məsər ti adaba àvia \*Məsuf gayan ana leli a palam.

14 Leli zla ti m̀ipia Wur ge Melefit a, məsəra Bəṅani Melefit àslərbiyu naṅ ti m̀igi Bay mahəṅgay mis ga duniya. Nahkay məhi ana mis zlam nani ti àgrava efeediṅ a.

15 Maslaṅa ya ti àdəm vay-vay Yezu naṅ Wur ge Melefit nahəma, maslaṅa nani ti Melefit naṅ àbu akaba naṅ, naṅ day naṅ àbu akaba Melefit akada mis bəlan.

16 Leli ti məsəra Melefit awayay leli, m̀əgəskabá pakama gani nana.

Melefit ti ere ye ti agray ni dek agray ti adaba awayay mis. Maslaṅa ya awayay mis nahəma, maslaṅa nani ti naṅ àbu akaba Melefit, Melefit day naṅ àbu akaba naṅ, nday cəeni akada mis bəlan.

17 Məsər ti leli m̀əbu mawayay mis àna hud bəlan akada ge Melefit ya awayay leli ni ti ahəmamam ? Məsər ti adaba kwa kani, vad ya ti Melefit amagrafəṅa seriya kè mis a ni ti àsi aṅgwaz ana leli do simiteni. Àsi aṅgwaz ana leli do ni ti adaba zlam ya ti leli m̀əbu magray a duniya bu ni ti akada ga Yezu ni.

18 Aṅgwaz ti tàrakaboru nday ata mawayavani do. Tamal mawayay mis àna hud bəlan ti m̀agray aṅgwaz koksah. Adaba mam, tamal aṅgwaz awər mis nahəma, àsəra atatraḅ naṅ. Maslaṅa ya ti aṅgwaz awər naṅ nahəma, ṅgay Melefit awayay naṅ àna hud bəlan ti àsərkaba lala faṅ do.

19 Leli ti mawayum Melefit, mawayum mis adaba Melefit àwayay leli enji.

<sup>20</sup> Tamal mis àdám : « Nu ti nawayay Melefit » mək ezirey wur ga mənani nahəma, maslaṅa nani asəkad malfada. Adaba mam, wur ga mənani ya ti epi ni tekeḍi àwayay naṅ do ni ti awayay Melefit ti ahəmamam ? Èpi naṅ do ni !

<sup>21</sup> Divi ga Yezu ya àdəfiki ana leli ni nihi : àdám maslaṅa ya ti awayay Melefit ti ahàr àdám mawayay wur ga mənani daya.

## 5

*Maslaṅa ya ti afəki ahàr ke Melefit ni ti eyefiṅ kà zlam ga duniya*

<sup>1</sup> Maslaṅa ya ti àgəskabá, adám Yezu ti naṅ \*Krist \*Bay gəḍakani ya amara ni ti Melefit ègia Bəṅana. Tamal maslaṅa awayay bəṅ ga bəza nahəma, awayay bəza ni daya.

<sup>2</sup> Məsər mawayay bəza ge Melefit ti ahəmamam ? Məsər ti adaba məbu mawayay Melefit, məbu magray zlam ya àhi ana leli grum ni daya.

<sup>3</sup> Mawayay Melefit ti məsər ahəmamam ? Məsər ti adaba məbu magray zlam ya ti àhi ana leli e Divi gayanṅ bu grum ni kəlavad. Divi gayanṅ gani nani ti zləzlada do,

<sup>4</sup> adaba ku way way do tamal Melefit ègia bəṅana nahəma, njəḍa gayanṅ àtama njəḍa ga zlam ga duniya ; zlam nday nani tèsipet naṅ koksah. Njəḍa ya àtam njəḍa ga zlam ga duniya ni ti mam ? Njəḍa gani nani ti məfəki ahàr geli ka Yezu.

<sup>5</sup> Njəḍa ga way àtama njəḍa ga zlam ga duniya ni way ? Si ga maslaṅa ya ti àfəki ahàr ka Yezu, àdám Yezu ti naṅ Wur ge Melefit ni.

### *Zlam ya ti adafaki Yezu nanj Wur ge Melefit ni*

<sup>6</sup> Yezu \*Krist ti àra a duniya va, àhuriyu a yam vu, \*tàbaray nanj, kələṅ gani tàbaya mimiz gayan a. Tàbaray nanj àna yam ciliṅ do, tàbaray nanj àna yam, tàbaya mimiz gayan a daya. Məsər ti pakama nani ma ge jiri ti adaba \*Məsuf ge Melefit àhia ana leli a. Məsuf gani nani ti ere ye ti adəm ni dek ma ge jiri.

<sup>7-8</sup> Adafaki Yezu Wur ge Melefit ededīṅ ti Məsuf, yam, mimiz. Nday mahkərani ni ti tɔdafaki zlam bəlanj.

<sup>9</sup> Tamal mægəsumkabu pakama ge mis ya tɔdəm ni ti ahàr àdəm mægəsumkabu pakama ge Melefit ya àdəm ni daya, adaba Melefit ti nanj gədakani, àtam mis dek. Pakama ge Melefit ya àdəm ni ti àdəmki ka Wur gayan Yezu Krist.

<sup>10</sup> Maslanja ya ti afəki ahàr ka Wur ge Melefit nahəma, àsəra a ahàr gayan ba pakama ge Melefit gani nani ti ma ge jiri. Ay maslanja ya ti àgəskabu pakama ge Melefit ya ti àdəm ni do ni ti maslanja nani àdəm Melefit àsəkad malfada. Adaba mam, àgəskabu pakama ge Melefit ya àdəmki ka Wur gayan Yezu Krist ni do.

<sup>11</sup> Melefit àhi mam ana leli mam? Àdəm àvia \*sifa ya àndav day-day do ni ana leli a. Sifa gani nani ti mənḡət azuhva Wur gayan Yezu Krist.

<sup>12</sup> Maslanja ya ti àgəskabá Wur ge Melefit a ni ti àṅḡəta sifa. Maslanja ya ti àgəskabu Wur ge Melefit ndo nahəma, àṅḡət sifa ndo.

### *Sifa ya àndav day-day do ni*

<sup>13</sup> Pakama gani nani ti nəbiki ana kəli adaba kəfumkia ahàr ka Wur ge Melefit a ; nawayay ti

kəsərum lekələm kəbum àna \*sifa ya àndav day-day do ni.

<sup>14</sup> Ka ya ti mahəŋgalay Melefit ni ti ere ye ti avi njəda ana leli ni ti nihi : məsəra tamal mihindiliŋa zlam ya ti àbəlafəŋ na ti eciiki ma geli ni ana leli.

<sup>15</sup> Tamal məsəra naŋ àbu eciiki zlam ya ti mihindiliŋ ni ana leli ti məsəra mənğəta zlam ya mihindi na àndava.

<sup>16</sup> Bi wur ga muk agudar zlam, zlam magudarani nani àzoru mis e kisim vu do, tamal kípia naŋ a ti hənğali Melefit. Nahkay ti Melefit aməvi sifa ana maslaŋa ya ti àgudar zlam ni, tigi ti zlam magudarani gayan ni àzoru mis e kisim vu do ni. Zlam magudarani ya ti azoru mis e kisim vu ni ti àbu. Nəhi ana kəli hənğalum Melefit ti azuhva nani do.

<sup>17</sup> Zlam ge mis ya tagray ni dek ti tamal tàgray ge jiri do ni ti dek zlam magudarani. Ay ti zlam magudarani ndahaŋ ya təzoru mis e kisim vu do ni ti təbu.

<sup>18</sup> Məsəra maslaŋa ya ti Melefit ègia Bəŋana nahəma, àgudar zlam va do, Wur ge Melefit ajəgay naŋ. Nahkay zla nahəma \*Seteni àgosay naŋ kok-sah.

<sup>19</sup> Məsəra Bay ya ti leli ndam gayan ni ti Melefit. Məsəra ndam ya tadəbay zlam ga duniya ni dek ti nday ndam ge Seteni.

<sup>20</sup> Məsəra Wur ge Melefit àra. Àra ti àvi njəda ana leli ga məsər Melefit Melefiteni. Nahkay leli məbu manjəhadani akađa mis bəlaŋ akaba Melefit Melefiteni, àna njəda ga Wur gayan Yezu \*Krist. Yezu Krist ti Melefit Melefiteni. Avay sifa ya àndav day-day do ni ti naŋ gani ciliŋ.



<sup>21</sup> Gabəza, pəra akaba zlam ndahaṅ ya ti ge Melefit do nahəma, kəgəsumkabu ba.

## **Ma M<sub>h</sub>weni Sulumani ge Melefit New Testament in Muyang**

copyright © 2013 Wycliffe Bible Translators, Inc.

Language: Muyang

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Muyang

**© 2013, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Apr 2025 from source files  
dated 29 Jan 2022

7fea74f6-4ba4-5a54-a7cf-a6c88fbc1968